

Museo Arkeologico Nacional Aruba

A ricibi bishita di alrededor di 8000 persona

ORANJESTAD- Dia cu a formula e proyecto pa ubica Museo Arkeologico na Schelpstraat 42, a pone e meta pa atrae por lo menos 3 biaha mas bishitante cu anterior. E prome aña tabata hopi exitoso y principalmente den comienso a ricibi hopi bishitante di cual gran parti tabata local. Entre otro esaki sigur tabata debi na e novedad di e Museo.

Den transcurso di 2010 a nota cu ainda tin un gran parti di nos mes un hendenan cu

nunca a bishita nos Museo Nacional di Arkeologia nobo. P'esey a inicia un campaña dirigi na nos hendenan local na luna di October 2010 y ya na November y December 2010 por a nota cu a ricibi mas bishitante cu e aña anterior. E tendencia aki a sigui pa Januari y Februari 2011, cu un piek di mas cu 1000 bishitante riba dia di Betico. Den total Museo Arkeologico a ricibi casi 8000 bishitante na 2010 y mas di 14 mil desde su apertura na juli 2009.

Di e bishitantenan na 2010,



65% ta local y e resto ta turista.

Por bisa cu na lunanan februari, september y november tin mas turista cu local ta bishita Museo.

Un encuesta ta muestra cu 54% di turistanan ta bishita Aruba pa prome biaha di cual 74% ta bin cu avion y e resto cu barco crucero. Di november 2010 pa februari 2011 a ricibi dos biaha mas bishitante local cu den e mesun periodo na 2009/2010. Personanan local ta bishita Museo mas tanto den siman y sa di Museo principalmente door di television y corant.

Turistanan ta haya sa di Museo principalmente door di revista y foyetonan. Cu e.o. e datonan aki Museo lo planea su maneho pa publico pa añanan venidero.

Innovacion ora di promove Museo cerca local y turista lo ta esencial den e maneho aki. Importante ta tambe pa desaroja e 'producto' Museo optimalmente door di e.o. habri Museo su souvenir shop, su

cafe y enrikece e programa publico.

Semper nos por siña algo nobo y Museo Arkeologico tambe kier keda siña y p'esey a cuminsa cu un concepto nobo pa su reunionnan di personal. Idea ta pa cada reunion invita un persona den comunidad cu tin un storia pa conta, pa un charla breve di 15 minuut. Un storia cu por inspira, motiva y educa.

Museo ta gradici sr. Rombley, e prome invitado pa e prome reunion di personal di Museo na 2011, pa su palabranan di inspiracion. Na un forma informal pero hopi educativo a haya 'herment' pa trata cu situacionnan di tension.

Algo cu un y tur por saca su beneficio for di dje. A tene e reunion aki disfrutando di un dushi desayuno.

Pa temporada di Carnaval Museo Arkeologico lo ta cera pa publico riba diadomingo dia 6 di Maart. Museo ta desea pueblo di Aruba dushi dianan di carnaval.

